

3. E inoi ana matou ki te mahia taua ture me ata whakauru ano he tikanga ki roto kia taea ai te whakatu etahi tangata Maori, e tika ana hei mangai mo te iwi Maori, ki roto ki tetahi Poari ina whakaturia he pera hei whakahaere i o matou whenua; a me hanga ano hoki e to koutou Whare honore he tikanga ki roto ki taua ture e riro ai ma ia takiwa ano e ata whakaae e mana ai taua ture ki to ratou takiwa, kia kore ai e pa he mate ki nga hapu e kore ana e pai ki te inoi o tenei pitihana.

I te mea he mea tika kia tere te oti o tetahi ture penei me tenei e inoitia atu nei i mua o te mutunga o tenei Paremete, na reira ka inoi atu o koutou kai-pitihana ki to koutou Whare honore kia paahitia he ture pera te ahua i naianei.

A ka inoi tonu atu o koutou kai-pitihana.

TAMAHAU MAHUPUKU me Etahi atu tokorua.

Pitihana No. 114.—Na WI PERE i tuku ki te Whare.

Ki te Honore Pika me nga Mema o te Whare Paremete: Tena koutou.

He pitihana inoi tenei na matou ki to koutou Runanga mo te Pire Poari me nga whakatikatika i mahia e te Komiti Maori i tu ki ki Papawai ite tau 1898.

Kia whakataua taua Pire Poari ki runga ki te Tai Rawhiti me te Tai Hauauru hei ture mo to matou takiwa.

A tena ta matou Komiti ka tukua atu ki kona hei hoa mahi tahi mo to koutou Komiti ki te whakatikatika i taua Pire Poari.

Heoi: Kia mana mai i a koutou te inoi a o koutou kai-pitihana.

ENOKA TE TAITEA me Etahi atu e 36.

Ko nga pitihana e whai ake nei he rite tonu te ahua o nga korero ki nga korero o No. 114 i runga nei, engari e tono ana kia pa te Pire Poari ki te Tai Rawhiti anake:—

- | | |
|---|--|
| No. 115. Tutanuku Tume me etahi atu 72. | No. 397. Hoera Katipo me etahi atu 69. |
| No. 116. Karaitiana Wirihana me etahi atu 84. | No. 411. Hone Paerata me etahi atu 158. |
| No. 168. H. T. Whatahoro. | No. 412. Eru te Whana me etahi atu 109. |
| No. 169. Tamahau Mahupuku me etahi atu 89. | No. 413. Wiremu Potae me etahi atu 106. |
| No. 170. Hautahi Aporo me etahi atu 110. | No. 414. Moana Tautau me etahi atu 56. |
| No. 321. Apirana Tukotahi me etahi atu 60. | No. 439. Heta Matua me etahi atu 10. |
| No. 322. Aperahama te Kume me etahi atu 73. | No. 440. Retireti Tapihana me etahi atu 111. |
| No. 390. Heta Hakiwai me etahi atu 127. | No. 455. Paku Maki me etahi atu 288. |
| No. 391. Wiremu Pikai me etahi atu 58. | No. 456. Hare Matenga me etahi atu 61. |
| No. 392. Tauha Nikora me etahi atu 11. | No. 467. Hori Puru me etahi atu 366. |
| No. 396. Ihaka Whanga me etahi atu 64. | |

PARAIRE, 15 o HEPETEMA, 1899.

PITIHANA A TUPU TAINGAKAWA RAUA KO TE RAWHITI.

Ka patairia ko HENARE KAIHAU.

1. *Te Tiamana*: Henare Kaihau, nau i tuku tetahi o nga pitihana nei ki te Whare, a he mea atu tenei mehemea he kupu au mo tenei putake, e hiahia ana ranei koe ki te karanga i etahi kai-korero?

Henare Kaihau: Ae, he kupu ano aku.

2. *Te Tiamana*: E pai ana, me korero mai koe ki te Komiti i naianei?

Henare Kaihau: Ko tenei pitihana na nga iwi Maori o te Tai Hauauru. He pitihana tenei e whakaatu ana i nga whakaaro i oti i a ratou i mua atu o ta ratou tukunga mai i au ki konei ki te kokiri i te Pire i whakatakotoria nei ki te aroaro o te Whare i te tau 1897.

3. *Kapene Rahera*: Ka patai atu ahau ki a koe, ko e hea Maori o te Tai Hauauru tau e mea nei?

Henare Kaihau: Ko nga iwi ra me nga hapu o te Tai Hauauru o tenei Motu—ara, e mohiotia nei ko te Takiwa Pootitanga Mema Maori o te Tai Hauauru. E whakaatu poto ana tenei pitihana i nga whakaaro o nga tangata tekau mano i tuku mai ra i ta ratou pitihana hei whakahe i te Pire Poari i te tuunga o te Paremete i te tau kua hori ake nei. Na reira, i runga i nga mate me nga raruraru kua pa ki a ratou mai o mua a taea noatia tenei ra, kua tuturu to ratou whakaaro me tuku mai e ratou he pitihana ki te Whare he tono kia mahia he ture i tenei tuunga o te Paremete—ara, tetahi ture e paingia ana e te Whare. Na reira hoki i inoitia ai kia tino uiuia a kia tino whiriwhiria nga take e whakaaturia ake nei e te pitihana nei. E tono ana te pitihana kia whakaturia he Kaunihera Maori hei whakahaere, hei rihi, i o ratou whenua, i raro ano i etahi tikanga ma te Paremete e whakaae. Na, i te mea e ki ana nga iwi me nga hapu Maori kei te pa he mate ki a ratou i te Kooti Whenua Maori, na reira ka inoi ratou kia whakakorea atu te Kooti Whenua Maori. Na, mo te rarangi o te pitihana e tono nei kia whakahaerea e te Whare tetahi tikanga hei whakamutu i te hoko whenua Maori, kei te mohio pea te Komiti ki te nui o te mate e pa ana ki nga Maori i runga i nga tikanga hoko whenua e mana nei; a ko tetahi, ki to matou whakaaro, ki te tirohia te iti rawa o nga toenga whenua e mau nei i nga Maori, he mea tika rawa kia wehea e te Kawanatanga etahi whenua o te Karauna hei rahui a hei orange mo nga Maori kore whenua. Otira ki taku mahara kaore kau he take e whakamarama roa ai au i enei mea, kei roa noa iho te Komiti i au,